

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 510 del 06/03/2025

Drai bochentn in di drai lentar pitt bichtege un pegaistege tème un trèff; allz ditza iz di akadèmia von Euregio – djunge von Tiról, Südtiról un Trentino mangse innschraim sin atz 27 von abrèl

Akadèmia von Euregio 2025: di djungen mangse innschraim

[Cimbro] Ren übar bia zo leba afte pèrng, von alpinar habitat un von klima bèkslom, khennen di grünt von Euregio Tiról - Südtiról -Trentino un nemmen toal in Forum vo Alpbach: dise un vil åndre okasionen opfarta di Akadèmia von Euregio 2025. Dar formatziong mangda nemmen toal di djungen boda hãm zbisnen in 18 un in 35 djar vo alln drai in lentar un boda hãm lust zo bizzasan mearar übar in sèll boda tüat dar Euregio un in da gelaichege zait khennense pezzar tra de se o. Di draitzekh toalnemmar bartn drau ren aftz bia 'z lem afte Alpm iz nã zo bèksla hërta bahémmege: di zaitn, saiz di sèlln kheltar, saiz di sèlln bermar hãm hërta gesbert starch saiz afte lentar, saiz afte lântbichtschaft. In di lestn djar iz khent hërta bermar un ditza khint vür hërta mearar bahemmegar, peng in klima bèkslom boda niamat mear mage abestraitn. Aftz dise tème, di djungen bartnse vennen zo reda vor drai bochentn, aniaglana bòtta in ummaz von drai lentar von Euregio, zo khenna pezzar in Euregio sèlbart un soine struktùrn un darzuar drauren pitt laüt bodasen drinndarkhennen un åndre boda soin gekhennt.

Vo Rovrait atz Alpbach durch Poatzan

Dar earst Treff vodar Akadèmia bartze haltn ka Rovrait von **23** sin atz **25 von madjo**. Pittnãndar pittar trentinar Stiftung Alcide De Gasperi, bartma nãsüachan bia di lentar boda soin gelebet von khnöpf von zungmindarhaitn von Euregio soinse vürgetrakk un bia da soin gest guat mittzoleba pinn åndarn in di djarhundart.

Dar zboate trèff bartze haltn in Südtiról von **4** sin atz **6 von höbiat**: ka Poatzan di djungen bartn arbatn pittnãndar pinn südtiolar Institut Eurac Research nãzosüacha übar in klima von drai lentar von Euregio un in klima bèkslom boda vürkhint afte Alpm. Ma bart o ren vo zungmindarhaitn un vo autonomi in Südtiról.

Dar lest trèff bartze haltn von **16** sin atz **18 von agósto** in di tang von Euregio Days in européan Forum vo Alpbach 2025 drinn in tiolar “Lânt von übarlegar”. Ma bart ren mearar baz åndarst vo bia di ziln vonar kompetitif Euròpa un dar schütz von klima bartn sbern afte alpinar lentar.

Innschraimse

Ma makse innschraim dar Akadèmia von Euregio 2025 sin atz **27 von abrèl 2025** durch dar websait von Euregio www.euregio.info/academy. Zo nemma toal in alln in trèff, drinn pitt geèzza un herbege, bartma mochan zaln 90 euro. Zo nemma toal iz grüntlich khãnen taütsch un beles (daz mindarste stèpfl B1) un an khurtzan schraib boma khött ombrómm ma bill nemmen toal.

Übarsetzt von Schaltarle vor di zung von Toalkamou vodar Zimbar Hoachebene

(cdt)